



續資治通鑑長編卷一百六

宋 李燾 撰

仁宗

天聖六年春正月丁酉朔馬軍副都指揮使武昌節度使彭睿卒上幸其第臨輿輟一日朝贈侍中遣官監護葬事法當得諡其家避都省集官之費而固辭之庚子上謂輔臣曰大臣之喪遣官監護葬事蓋出於恩禮而近歲喪家過有所費況祥符詔書自使相以下皆有定數今宜稍增其舊踰者令閣門御史臺金吾街仗司糾之其不願敕葬者亦聽詔閣門祇候自今經厯邊任及中外委使者特與五年磨勘餘並具功過奏裁辛丑契丹遣左千牛衛上將軍耶律阿果起居郎知制

新書通鑑卷一百六
誥李奎來賀長甯節

己酉罷兩川歲貢乾元長甯節織成佛 詔自今南郊

軍賞有闕其三司官吏並劾罪以聞先是南郊賞賜軍士而汾州廣勇軍所得帛不逮他軍一軍大譟捍守佐堂下劫之約予善帛乃免城中戒備遣兵圍廣勇營轉運使孫冲適至命解圍弛備置酒張樂推首惡十六人斬之遂定初守佐以亂軍所約者上聞詔給善帛使者至潞冲促之還曰以亂而得所欲是誘之亂也卒留不予既而上以軍賞事訊三司三司言汾州舊以淮南紬絹比折給軍士紬絹不足又令以土絕布代之故廣勇軍作亂首惡既坐誅餘悉配隸他州而降是詔

實錄載汾州事

與孫冲傳略不同
今從冲傳

甲寅司天秋官正楊可言熒惑行近天街當犯而不犯請付史館從之然議者謂五星凌犯見於占測非算數所知今日官言當犯而不犯非也

戊午詔諸路提點刑獄朝臣使臣交割本職公事與轉運使副使仍令轉運司條所省事件以聞或言提點刑獄官過爲煩擾無益於事故也

庚申上封者言三司判官開封府推判官近歲數遷易又多權要陳乞請自今並選有材幹而嘗更任使者爲之俟二年以上方除外任監司京朝官知縣兩任爲通判又兩任爲知州三班使臣一任監當入監押巡檢資任太速請各增一任若有顯劾及累被薦舉者令審官三班院以名聞又進士及第本以辭藝進而比來多乞

賜子孫科名又閣門祇候太宗朝其員至少真宗置提點刑獄副使因詔近臣舉厯官有勞者授之其後又益舉者至七人以艱其進今權要之家比援恩例而濫進者多請一切罷之諸路走馬承受歲滿當除閣門祇候止與遷一官並從之仍著爲令

癸亥免河北州軍災傷人戶夏秋稅折變一年詔天下應在官物令諸路轉運使選所部同判或幕職官期三年內悉除之百萬以上歲中除十之八者升陟不及百萬而歲中悉除者錄其勞過期者劾罪以聞甲子建州觀察使康繼英請以南郊所加恩回贈其祖再遇一官詔優贈之

二月辛未以知揚州祠部員外郎杜衍爲刑部員外郎

先是衍提點河東路刑獄甯化軍守將鞫人死罪不以實衍復正之守將不伏訴於朝詔爲置獄果不當死於是是有司言法當賞衍特遷之宰臣王曾等言真宗忌

自大祥後禁刑不視事前後各三日禁樂各五日然歲月漸遠禮有可殺之文詔自今禁刑不視事各兩日禁樂各三日詔太常寺四郊齋宮常行視完葺之少府

監祠服遣吏齋赴祠所以給祠官光祿寺進服令監祭使封題同進判太常寺孫奭言皇地祇等十八壇皆

有外壇而南郊獨無樵牧之人徑至壇下有瀆嚴恭按

圖設三壇今請築外壇仍於壇外築短垣四面各置櫺

星門俟皇帝親郊則以青繩柱表其三壇以合郊丘之

制從之同知禮院王皞言諡者行之表也善行有善

諡惡行有惡諡蓋聞諡知行以爲勸戒六典太常博士掌王公以下擬諡皆述其功德而爲之褒貶職事官三品以上散官二品以上佐吏錄行狀申考功下太常擬諡訖申省擬定聞奏近日臣僚薨卒雖官品合該擬諡其子弟自知父祖別無善狀慮定諡之際斥其繆戾皆不請諡竊以諡法自周公以來垂爲不刊之典益以彰善瘴惡激濁揚清使其身歿之後是非較然用爲懲勸今若任其遷避則爲惡者肆志而不悛欲乞今後凡有臣僚薨謝不必候本家請諡並令有司舉行如此則隱慝無行之人有所沮勸若謂須佐吏錄行狀申乞方行擬諡臣略觀方冊別無明證惟春秋衛公叔文子卒其子戍請諡於君曰日月有時將葬矣請所以易其名者

謂春秋之時周德下衰於是禮壞樂缺公叔之卒有司
不能明舉舊典故致將葬始請諡於君且周制太史掌
小喪賜諡小史掌卿大夫之家賜諡褒誅以此知有司
之職自當舉行明矣又言兄弟同朝如遇覃恩俱該封
贈父母除中書樞密院外乞許令列狀陳請仍於告身
具列兄弟職位特比常例優與推恩詔並從之據會要
法及論封贈皆在五年十月今並從實錄
蓋嶧所論先下禮院乞如所請施行故也
使王世融爲內殿承制監虢州稅初世融女嫁東頭供
奉官承詔不相能世融託妻病奏詔承詔過其家被酒
乃與二子毆之法寺議世融上書詐不實當追官勒停
上特寬其罪亦勒承詔朝參承詔德鈞子世融承衍子
也

甲戌詔永興軍涇陽知縣兼管勾三白渠先是都官員外郎監正陽鎮酒稅李同言三白渠宜立約以限水因擢用知縣而有是命

丁丑詔上御藥供奉藍元用張懷德羅崇勳並落供奉爲上御藥

戊寅上謂輔臣曰登州採金歲益數千兩其官吏宜降詔褒諭王曾對曰採金既多則農民皆廢業而趨利不當更誘之上曰誠如所言然官吏勤事亦不可不勸也庚辰大風晝暝甘州可汗寶國伊嚙格勒遣使貢方物

壬午工部尙書平章事張知白卒知白在相位惜名器無毫髮私常以盛滿爲戒雖顯貴其清約如寒士然體

素羸憂畏日侵在中書忽感風眩輿歸第帝親問疾已不能語卒爲罷社燕贈太傅中書令太后臨奠之其家以貧辭敕葬詔送終之具悉從官給且諭王曾等令共恤其家禮官謝絳議諡文節御史王嘉言以爲絳止因車駕臨問覩其寢處儉素爲之動容乃引好廉自克爲諡似略其大而錄其小以知白守道徇公當官不撓可謂正矣請諡文正王曾曰文節美諡矣遂不改嘉言禹偁子也或言知白與虞部員外郎楊儔者善自西川罷歸知白欲令審官先與除授曾不可曰百執事釐務自有次序儔安可先也未幾曾以疾謁告參知政事魯宗道迎知白意義先與儔官知白忻然從之後宗道乃對上發其事知白驚惋自失退而引咎謝曾因之抑鬱數

月而沒故知白不喜宗道常語人曰銓曹中取一最不

材選人軍巡獄中求一最無行者亦當優於此子矣與先

楊傳官據王子融言行錄惡魯宗道據子融百一編然

考之

丙戌詔江淮鹽糧綱卒歲一代之每歲十一月放還營

至春如舊

丁亥益州路轉運使狄棐言雅州地僻請如維茂黎三

州例舉本路知縣人爲知州從之去年六月

辛卯上諭三司曰太平興國寺太宗所建歲久隳摧其

以諸塔廟所施亡僧衣鉢錢增葺之開封富民陳氏

殺傭作者而誣以自經死事覺輒逃匿不獲判官侍御

史李應言指其豪橫結權要請嚴捕之王辰出應言知

河陽而事遂緩應言尋徙壽州

慶曆三年七月李應言有附傳但無邑里

定王府記室參軍刑部郎中康孝基言前後宮僚例帶

館職望稽典故俾登深嚴

會要六年二月二十六日事實錄不載孝基自陳

癸巳命知制誥徐奭龍圖閣待制孔道輔除放三月欠

負

詔乾元長甯節禁決大辟前後各二日餘罪惟正

節曰權停

甲午雄州言民妻張氏戶絕田產於法當給三分之一

與其出嫁女其二分雖有同居外甥然其估爲緡錢萬

餘當奏聽裁上曰此皆編戶朝夕自營者毋利其沒入

悉令均給之宰相王曾參知政事呂夷簡魯宗道咸贊

曰非至仁何以得此也

三月丙申朔日有食之

辛丑詔陝西河北京西民困災傷流移者免所過渡錢
壬寅召輔臣崇政殿西廡觀侍講孫奭講尚書

戊申太后幸贈侍中劉美第左司諫劉隨奏疏勸止太
后納其言自後不復再駕

此據宋祁所作隨墓銘傳云太后不宜數幸外家恐誤也

今改之

己酉京西轉運使楊嶠言澶州浮橋用船四十九隻自
温州厯梁堰二十餘重凡三二歲方達澶州請自今於
秦隴同州伐木磁相州取鐵及石炭就本州造船從之
嶠礪子也

辛亥詔歲調鄆曹濮等州丁夫以治澶州河隄頗妨農
業自今發鄰州卒代之又詔河北緣邊安撫司契丹
歸明人嘗授僞官者勿留追號江南處士史虛白爲

冲靜先生虛白有高節善屬辭五代亂離隱居巖谷李氏累聘不起至是其孫虞部員外郎溫己以虛白文集來上特追旌之

張知白既卒上謀所以代之者宰相王曾薦呂夷簡樞密使曹利用薦張士遜太后以士遜位居夷簡上欲用之曾言輔相當擇才不當問位太后許用夷簡夷簡因奏事言士遜事上於壽春府最舊且有純懿之德請先用之太后嘉其能讓王子樞密副使張士遜爲禮部尙書平章事從利用之言也曾加吏部尙書利用加保平節度使進封鄆國公張耆改泰甯節度使封岐國公參知政事呂夷簡加戶部侍郎魯宗道加禮部侍郎樞密副使夏竦加給事中

王曾曹利用薦相見江氏雜志又據馮氏御史臺記張知白既卒月

餘王曾留身議命相后欲用張士遜且言遜位夷簡上曾曰相當以才昇不以位次后許用夷簡是日晚兩府復奏事夷簡因留身讓士遜后卒相士遜今參取二書

癸丑以右諫議大夫知永興軍姜遵爲樞密副使遵長於吏事其治尙嚴猛所誅殘者甚衆時人號爲薑擦子太后遣內侍曾繼莘於永興軍營浮屠屠遵希太后旨悉毀漢唐碑碣以代甄甓而又佐繼莘躬自督治旣成乃得召用云繼莘尋死於塔所人謂鬼誅之也

丁巳詔諸河押運殿侍犯杖罪令轉運發運司依三軍大將例勘決施行

戊午以試中身言書判掌禹錫等八人爲京官餘六十四人第遷如故事禹錫鄜城人也

己未龍圖閣直學士右諫議大夫權三司使公事范雍

爲樞密副使仍班姜遵之上

辛酉以樞密直學士右諫議大夫知益州薛奎爲龍圖閣直學士權三司使公事右諫議大夫權御史中丞程琳爲樞密直學士知益州成都歲市布織縑數千萬以給秦隴軍用吏多隱剋爲姦奎令民自相保任預貸其直以期會輸官民便之有掘地得僞蜀時中書印者貯錦囊中夜掛城西門閤吏晨取以白從而觀者以萬計皆恟恟以爲異奎顧主藏吏藏之略不取視民婦訟其子不孝詰之乃曰貧無以爲養奎出俸錢予之戒曰若復失養吾不貸汝矣其子母遂如初上元然燈與僚吏夜燕佛寺有戍卒殺人於市市人皆奔走奎密遣捕殺之坐客莫有知者其臨事持重明決多類此